



Në mbështetje të nenit 9 paragrafi 1, nenit 5 paragrafi 1, nën-paragrafi 1.1., pika 1.1.1., nenit 12 paragrafi 1, nën-paragrafi 1.5. dhe nenit 22, paragrafi 3 të Ligjit Nr.08/L-017 për Agjencinë për Parandalimin e Korrupsionit, nenit 21 paragrafi 2 të Ligjit nr. 06/L-011, për Parandalimin e Konfliktit të Interesit në Ushtrimin e Funkcionit Publik (tutje: Ligji për Parandalimin e Konfliktit të Interesit), nenit 11 paragrafi 4 dhe 5, si dhe nenit 12 paragrafi 1 nënparagrafi 1.7. të Rregullores Nr. 03/2023, për Procedurat për Hetimet Administrative në Agjencinë për Parandalimin e Korrupsionit, Drejtori i Agjencisë për Parandalimin e Korrupsionit, me datë 22.03.2024, nxjerrë këtë:

AGJENCIA PËR PARANDALIMIN E KORRUPSIONIT AGENCY FOR PREVENTION OF CORRUPTION	
Dok. Nr. DPKI	Pr. Nr. 505/24
Pr. Nr. 05	Datë 22.03.24

V E N D I M

- I. Ekziston konflikti i interesit në rastin APK-DPKI-06-2165/23, për zyrtarin z. Valdrin Demiraj, zv. Zyrtar i Prokurimit në Spitalin e Përgjithshëm "Dr. Sami Haxhibeqiri" në Mitrovicë (tutje: Spitali i Mitrovicës), pasi që në cilësinë e anëtarit të Komisionit sipas Vendimit Nr.07/1554 i datës 20.06.2023, ka marrë pjesë në vendimmarrje në konflikt të interesit me rastin e vlerësimit të kandidatës me Kodin 07/1084 (personi i afërm-teze), sipas Konkursit Nr. 07/837 i datës 25.04.2023.
- II. Agjencia për Parandalimin e Korrupsionit kërkon nga Spitali i Mitrovicës:
 - a) shfuqizimin e Vendimit Nr. 07/1751 datë 19.07.2023, përkitazi me kandidaten me Kodin 07/1084, si dhe akteve tjera juridike që e kanë pasuar të njëjtin, dhe atë konform dispozitave të Ligjit për Parandalimin e Konfliktit të Interesit,
 - b) iniciimin e procedurës disiplinore ndaj z. Valdrin Demiraj, për shkeljet e dispozitave të Ligjit për Parandalimin e Konfliktit të Interesit,
- III. Agjencia për Parandalimin e Korrupsionit, lidhur me dyshimet për veprën penale e procedon rastin në prokurorinë kompetente, konform dispozitave përkatëse të Ligjit për Parandalimin e Konfliktit të Interesit;
- IV. Vendimet e Agjencisë në lidhje me konfliktin e interesit janë përfundimtare në procedurë administrative si dhe të njëjtit bëhen publik në faqen zyrtare të Agjencisë.

A r s y e t i m

- I. Rasti i hapur nën dyshimin për konflikt interesi për zyrtarin e lartë publik z. Valdrin

Demiraj, zv. Zyrtar i Prokurimit në Spitalin e Mitrovicës, është trajtuar sipas procedurës së paraparë me Ligjin për Parandalimin e Konfliktit të Interesit në Ushtrimin e Funkcionit Publik.

Agjencia ka filluar trajtimin e këtij rasti pas pranimit të raportimeve nga jashtë (DPKI-06-2165/23; DPKI-01-186/24) me pretendimet se "Zyrtari Valdrin Demiraj, në cilësi të anëtarit të komisionit për pranimin e punëtorëve në punë, e ka pranuar në punë tezen e tij (motrën e nënës).

Në pajtim me nenin 22, paragrafin 3, dhe 5 të Ligjit për Parandalimin e Konfliktit të Interesit, Agjencia për Parandalimin e Korrupsionit përmes shkresës zyrtare DPKI-06-02/312/23, e ka njoftuar palën për fillimin e procedurës së shqyrtimit të gjendjes së konfliktit të interesit.

Me qëllim të sqarimit të plotë dhe të gjithanshëm të këtij rasti, në ambientet e Agjencisë është realizuar një takim me z. Valdrin Demiraj, ku janë diskutuar dhe shtjelluar çështjet që kanë të bëjnë me rastin në fjalë, ndërsa z. Demiraj ka konfirmuar faktin se në cilësinë e anëtarit të Komisionit sipas Konkursit Nr. 07/837 i datës 25.04.2023, ka marrë pjesë në vlerësim të kandidatës me Kodin 07/1084, e cila edhe është përzgjedhë si kandidate e suksesshme, si dhe faktin se me të njëjtën është në lidhje familjare (teze-motra e nënës) porse që nuk ka qenë në dijeni se një situatë e tillë përben konflikt të interesit.

Çështja e afërsisë familjare ndërmjet z. Demiraj dhe kandidatës së përzgjedhur është vërtetuar edhe nga Agjencia e Regjistrimit Civil, e cila në përgjigjen e saj drejtuar Agjencisë (DPKI-06-409-1/24) ka konfirmuar se, bazuar në Regjistrin Qendror të Gjendjes Civile, është konstatuar lidhja e afërsisë familjare ndërmjet z. Valdrin Demiraj dhe S.D. (nip-teze).

Agjencia për Parandalimin e Korrupsionit përkitazi me rastin në fjalë, ka kërkuar dokumentacion shtesë nga Spitali i Mitrovicës, dhe të njëjtat i kemi pranuar përmes shkresës DPKI-06-454/24.

Pas shqyrtimit të informacioneve dhe dokumenteve të bashkangjitura nga raportuesit e rastit, pastaj deklaratës së z. Demiraj, si dhe dokumentacionit të siguruar nga Agjencia e Regjistrimit Civil dhe Spitali i Mitrovicës, rezultojnë gjendja faktike si në vijim:

Me aprovimin nga Bordi Drejtues i Shërbimit Spitalor dhe Klinik Universitar i Kosovës, Spitali i Mitrovicës, më datën 25.04.2023 ka nxjerrë Vendimin Nr. 07/836, për shpalljen e Konkursit Publik për pozitat përkatëse ndër to edhe pozita Infermiere (Bachelor 5 pozita dhe Shkolla e Mesme 3 pozita). Në të njëjtën datë, është shpallur edhe Konkursi Nr. 07/837.

Pastaj, më datën 20.06.2023 Spitali i Mitrovicës ka nxjerrë Vendimin Nr. 07/1554, për formimin e Komisionit të Konkursit për: infermier/e të Përgjithshëm – Shkolla e Mesme (tri (3) pozita), ku pjesë përbërëse në cilësi të anëtarit të Komisioni është caktuar edhe z. Valdrin Demiraj.

Në cilësinë e anëtarit të komisionit z. Demiraj ka marrë pjesë në vlerësimin e testit me shkrim (bashkërisht nga të gjithë anëtarët e komisionit, e gjithsecili me nënshkrimin përkatës) për kandidaten me Kodin 07/1084, pastaj në shpalljen përfundimtare të rezultateve të testit me shkrim Nr. 07/1666 e datës 06.07.2023, si dhe në vlerësimin individual nga z. Demiraj për

kandidaten e njëjtë, me të cilën është në lidhje familjare (gjinia e gjakut, shkalla e tretë-vija e tërthortë). Gjithashtu, z. Demiraj ka marrë pjesë në vendimmarrje me rastin e nxjerrjes së Vendimit Nr. 07/1751 i datës 19.07.2023, për përzgjedhjen e kandidatëve për pozitën Infermier/e i/e Përgjithshëm/me, ku në mesin e kandidatëve të përzgjedhur figuron edhe kandidata me Kodin 07/1084.

Andaj, referuar pjesëmarrjes së z. Demiraj në proceset si më sipër, Agjencia ka konstatuar si në pikën I. të dispozitivit të këtij vendimi se, ekziston konflikti i interesit në rastin konkret për zyrtarin z. Demiraj, pasi që i njëjti në cilësinë anëtarit të Komisionit Vlerësues ka marrë pjesë në vendimmarrje në konflikt të interesit duke vendosur për personin e afërm, në kundërshtim me nenin 17, paragrafi 1, lidhur me nenin 6, nenin 3, paragrafi 1, nënparagrafi 1.2, 1.6 dhe 1.12 të Ligjit për Parandalimin e Konfliktit të Interesit, ku është përcaktuar se:

“Çdo zyrtar gjatë ushtrimit të funksionit të tij publik, në bazë të njohurive të tij dhe në mirëbesim, detyrohet që të bëjë vetëdeklarimin paraprak, rast për rast, të ekzistencës së interesit të tij privat ose të personave të afërm me të lidhur me vendimmarrjen në një çështje të caktuar, që mund të bëhet shkak për lindjen e një konflikti të interesit dhe të tërhiqet nga kjo vendimmarrje”.

...lidhur me nenin 6 të Ligjit për Parandalimin e Konfliktit të Interesit, me të cilin është përkufizuar se:

“Konflikti i interesit lind nga një rrethanë në të cilën zyrtari ka interes privat, që ndikon, mund të ndikojë ose duket se ndikon në kryerjen me paanshmëri dhe objektivitet të detyrës së tij zyrtare.”

nenin 3, paragrafi 1, nënparagrafi 1.2 dhe 1.6, të Ligjit për Parandalimin e Konfliktit të Interesit, me të cilët përkufizohet se:

“Interesi privat i personit zyrtar - nënkupton çfarëdo përparësie për personin zyrtar, familjen e tij, të afërmit, miqtë dhe personat apo organizatat me të cilat ai ka pasur apo ka marrëdhënie afariste”

“person i afërm me zyrtarin – bashkëshorti ose personi që bashkëjeton, të afërmit në vijë të drejtë të gjakut pa kufizime, të afërmit në vijë të tërthortë deri në shkallën e katërt, adoptuesi, i adoptuari, i afërmi në gjini të krushqisë deri në shkallën e dytë si dhe çdo person fizik apo juridik i cili ka pasur ose ka një lidhje të përbashkët interesi privat pasuror ose jopasuror me zyrtarin. Per qëllime të këtij ligji, personi juridik konsiderohet si person i afërm, sipas dispozitave të Kodit Penal të Republikës së Kosovës.”

si dhe nën-paragrafin 1.12 të këtij neni, i cili definon nocionin e vendimmarrjes si:

“çasti i fundit i procesit vendimmarrës gjatë të cilit vendoset përmbajtja përfundimtare e aktit apo kontratës si dhe ato çaste paraprake të vendimmarrjes të cilat janë thelbësore dhe përcaktuese në të cilat pjesëmarrja, ndikimi dhe qëndrimi i zyrtarit përcaktojnë përmbajtjen përfundimtare të aktit apo kontratës si dhe çdo veprim i zyrtarit në ushtrimin e funksionit publik”.

Pra, konflikti i interesit është i lidhur ngushtë me procesin e *vendimmarrjes*, nën kushtet e ekzistencës së *Interesit privat të zyrtarit ose të personave të afërm*, në një çështje të caktuar. Në rastin konkret, Agjencia për Parandalimin e Korrupsionit ka konstatuar konfliktin e interesit, pasi që janë plotësuar kushtet e sipërpërmendura kumulative, si: *përfshirja në vendimmarrje në lidhje me interesin privat të personit të afërm*.

II. Agjencia për Parandalimin e Korrupsionit, kërkon nga Spitali i Mitrovicës shfuqizimin e Vendimit Nr. 07/1751 datë 19.07.2023, përkitazi me kandidatin me Kodin 07/1084, si dhe akteve tjera juridike që e kanë pasuar të njëjtin, dhe atë konform nenit 22, paragrafi 13, të Ligjit për Parandalimin e Konfliktit të Interesit, i cili përcakton se:

“Agjencia i kërkon rishqyrtimin, revokimin dhe/ose shfuqizimin e aktit të nxjerrë në konflikt të interesit organit që e ka nxjerrë atë. Që nga momenti kur Agjencia kërkon rishqyrtimin e vendimit, çdo veprim për zbatimin e tij pezullohet deri në momentin kur organi vendos për vlefshmërinë e vendimit.”

si dhe nenin 24 paragrafi 5, me të cilin është përcaktuar se: *Agjencia iniciom procedurën administrative për revokimin ose shfuqizimin e akteve nga ana e institucionit që i ka lëshuar ato në konflikt interesi.*

Gjithashtu Agjencia kërkon iniciimin e procedurës disiplinore ndaj z. Valdrin Demiraj, për shkeljet e dispozitave të Ligjit për Parandalimin e Konfliktit të Interesit, dhe atë sipas nenin 24 paragrafit 1 të këtij ligji, me të cilin është përcaktuar se:

“Çdo shkelje e dispozitave të këtij ligji do të konsiderohet edhe si shkelje disiplinore, pavarësisht përgjegjësiive eventuale penale. Shkeljet disiplinore trajtohen në pajtim me rregullat që i rregullojnë marrëdhëniet e punës dhe statusin e zyrtarëve. Institucionet/organizatat që i kanë iniciuar procedurat disiplinore sipas këtij ligji duhet ta njoftojnë Agjencinë për iniciimin dhe rezultatin e atyre procedurave.”

III. Agjencia për Parandalimin e Korrupsionit, lidhur me dyshimet për veprën penale e procedon rastin në prokurorinë kompetente, në pajtim me nenin 24, paragrafi 2 dhe 3 të Ligjit për Parandalimin e Konfliktit të Interesit, ku është përcaktuar se:

“Dispozitat e Ligjit për Parandalimin e Konfliktit të Interesit nuk përjashtojnë përgjegjësinë disiplinore dhe penale të zyrtarit sipas legjislacionit në fuqi”, si dhe

“Agjencia, çdo zyrtar, udhëheqës i zyrtarit dhe çdo institucion ushtrojnë kallëzim penal në prokurorinë e shtetit kompetente ndaj zyrtarit i cili shkel detyrimet e parapara me këtë ligj, e që përbëjnë vepër penale sipas Kodit Penal të Republikës së Kosovës”,

...lidhur me nenin 5, paragrafi 1, nënparagrafi 1.4, të Ligjit për Agjencinë për Parandalimin e Korrupsionit, ku përcaktohet se:

Agjencia është përgjegjëse për: “Referimin e kallëzimeve penale në prokurorinë e shtetit ose në rast të shkeljes administrative përcjelljen e rastit tek organi administrativ kompetent”.

VI. Të gjitha vendimet që i nxjerr Agjencia për Parandalimin e Korrupsionit lidhur me konfliktin e interesit në ushtrimin e funksionit publik dhe shkeljen e dispozitave të Ligjit për Parandalimin e Konfliktit të Interesit, duhet të respektohen nga zyrtarët dhe institucionet përgjegjëse. Ato janë përfundimtare në procedurën administrative, dhe bëhen publike në faqen zyrtare të Agjencisë, konform nenit 22, paragrafi 12 të Ligjit për Parandalimin e Konfliktit të Interesit.

Në kuptim të paragrafit 4 të nenit 19 si dhe paragrafit 1 të nenit 24 të Ligjit për Parandalimin e Konfliktit të Interesit, Spitali i Mitrovicës duhet ta njoftoj Agjencinë lidhur me veprimet e ndëmarra në kuptim të pikës II të dispozitivit të këtij vendimi.

Nga sa u tha më lartë, u vendos si në dispozitiv të këtij vendimi.

Vendimi iu dërgohet:

- Zyrtarit publik (palës)
- Udhëheqësit të Spitalit të Përgjithshëm në Mitrovicë
- Drejtorit të DPKI- së
- Z./znj. (zyrtari përgjegjës)

Yll Bulozhaj
Drejtore i Agjencisë
për Parandalimin e Korrupsionit